

Unico autor Arubiano riba Amazon.com cu su buki "Nameless"

Minister Hooyboer-Winklaar ta aplaudi talento di hoben autor Jermin Bell



Minister di Asuntonan Economico, Asuntonan Social y Cultura, Michelle Hooyboer-Winklaar recientemente a ricibi un buki di Jermin Bell, autor di e buki "Nameless". Esaki ta un buki cu ta un coleccion di carta y poesia cu Bell a skirbi di su propio inspiracion. "Hopi biaha nos ta cuestiona diferente cos cu ta pasa nos den bida y el a haci'e den forma di cartanan pa por haya e contestanan di con cierto cosnan ta sosode den bida", e minister a señalá. E mandatario a haya

importante pa menciona cu esaki ta un otro autor hoben cu ta studiando actualmente pero cu ta mira cu el a haci esaki banda di su estudio y awe nos ta mira un bunita produccion cu ta inspiracion pa otronan cu tin un talento y e interes pa por skirbi caminda ta wak cu esaki ta posibel.

Esaki ta un arte cu ta rekeri dedicacion ya cu hopi biaha esaki ta rekeri hopi tempo pa hacie, pero na final di dia por haya algo sumamente bunita, ela agrega. Minister Hooyboer-

Winklaar a subraya cu Jermin Bell ta e unico autor Arubiano cu actualmente ta riba Amazon.com.

"Nos tur mester di influencia di buki den nos bida. E ta bunita cu nos por wak mas y mas bukinan drenta riba mercado ya sea na papiamento of na Ingles, pero cu tog ta wak e combinacion eynan y e variacion di e temanan locual ta inspira mas personanan pa skirbi y esey ta locual kier logra, e mandatario a enfatiza.

Banda di esaki, Jermin Bell



a duna di conoce cu ora cu e tabata tin 12 aña su mama a fayece y no tabata compronde kico kiermen fayecimento y con el a pasa esey cune. El a dicidi di skirbi un carta na Dios un puntr'e e preguntanan aki.

E inspiracion cu ela haya tabata e contesta riba e preguntanan cu e tabata tin. Esey ta locual por mira riba e buki cu yama "Nameless". Tur loke por mira den e buki ta a base di su inspiracion manera contenido, color, cover, etc. "Mi deseo tabata pa inspira tur esunnan cu ta lesa e buki. Mi ta kere cu ora cu bo ta biba inspira bo ta biba feliz", el a bisa.

E buki ta parti den 3 categoria cual ta romance, identidad y tambe spiritualidad. Esaki ta e categorianan cu e ta kere cu e

ser humano ta deal cu nan den e bida diario. Cada categoria ta wordo identifica cu un color. A tuma 12 aña pa skirbi y e publica e buki aki. El a haya su permiso ora e tabata tin 13 aña, pero a tume 10 aña pa acumula tur loke tin den e buki "Nameless". Mester a haya tambe financiamiento y un editor.

Ainda Bell no ta sigur si ta bay tin mas buki. E lo wordo guia door di inspiracion. Pa loke ta e titulo, el a laga sa cu pa esaki el a conecta cu su mes y e prome y unico titulo cu a bin na su mente tabata "Nameless". "Asina e titulo a bin", el a splica.

E buki ta pa tur publico. E ta na idioma Ingles y disponibel na tur libreria na Aruba, tambe riba Amazon.com y pronto riba iBooks tambe.